



**PENGERUSI JAWATANKUASA  
KIRA-KIRA WANG NEGARA (PAC)  
MERANGKAP AHLI PARLIMEN IPOH TIMUR**  
PEJABAT JAWATANKUASA KIRA-KIRA WANG NEGARA  
PARLIMEN MALAYSIA, JALAN PARLIMEN  
50680 KUALA LUMPUR

*Tel* : 03-2601 7263 / 2698 6852 (DL)  
*Faks* : 03-2698 9218  
*Email* : [pacparlimen@parlimen.gov.my](mailto:pacparlimen@parlimen.gov.my)  
*Laman Web* : <http://www.parlimen.gov.my/pac>

1 Disember 2021

## **KENYATAAN MEDIA**

1. Jawatankuasa Kira-kira Wang Negara (PAC) hari ini, membentangkan Laporan PAC berhubung Perolehan Vaksin Covid-19 Dan Penggunaannya Terhadap Rakyat Malaysia Di Bawah Kementerian Sains, Teknologi Dan Inovasi (MOSTI), Kementerian Kesihatan Malaysia (KKM) Dan Kementerian Kewangan (MOF).
2. PAC mengambil masa selama kira-kira setahun untuk melengkapkan prosiding ini dengan memulakan prosiding pada 5 Januari 2021 dengan memanggil Menteri Sains, Teknologi dan Inovasi, Khairy Jamaluddin dan Menteri Kesihatan, Datuk Seri Dr Adham Baba ketika itu.
3. Jawatankuasa ini, menggunakan punca kuasa di bawah Peraturan 77(1)(d) dan 83(2) Peraturan-peraturan Majlis Mesyuarat Dewan Rakyat (PPMDR) untuk mengadakan prosiding serta memanggil semua saksi yang berkepentingan dalam isu ini.
4. Antara saksi yang turut dipanggil memberikan keterangan dan penjelasan dalam empat prosiding yang diadakan termasuk Menteri Kewangan, Datuk Seri Tengku Zafrul Tengku Abdul Aziz, Ketua Setiausaha Perbendaharaan, Datuk Asri Hamidon, Ketua Pengarah Kesihatan, Tan Sri Dr Noor Hisham

Abdullah, Ketua Setiausaha MOSTI, Datuk Ir Dr Siti Hamisah Tapsir dan Datuk Mohd Shafiq Abdullah, KSU KKM.

5. Prosiding terakhir untuk isu ini, adalah pada 2 Ogos 2021 dan PAC mengambil masa kira-kira tiga bulan untuk melengkapkan laporan ini dengan mengadakan Mesyuarat Penyediaan Laporan (*Housekeeping*) sebanyak dua kali iaitu pada 2 November dan 3 November 2021.
6. Hasil daripada prosiding berkenaan, PAC membuat lapan (8) rumusan iaitu:
  - (i) Urusan perolehan vaksin telah dilaksanakan secara teratur mengikut tatacara kewangan yang dibenarkan MOF. PAC berpuas hati dengan harga perolehan vaksin daripada pelbagai portfolio oleh Kerajaan yang didapati adalah munasabah. Walau bagaimanapun, PAC mendapati harga premium (peningkatan antara 16.78% - 18.12%) perlu dibayar oleh Kerajaan dalam pembelian sebahagian Vaksin Sinovac – *Finished Product*, antaranya akibat kelewatan Pharmaniaga dalam penghantaran pada bulan April, Mei dan Jun 2021 dan juga atas keperluan mendesak dalam tempoh tersebut. PAC berpendapat Kerajaan harus berpegang kepada harga yang sama seperti yang termaktub dalam perjanjian awal;
  - (ii) PAC berpuas hati dengan koordinasi antara MOSTI, KKM, MOF dan agensi-agensi Kerajaan yang lain dalam PICK;
  - (iii) Disebabkan sumber kewangan yang terhad, Kerajaan tidak mampu untuk meletakkan wang tempahan (*strategic bet*) kepada syarikat-syarikat pengeluar untuk tempahan awal tanpa maklumat klinikal. Ini merupakan salah satu faktor Malaysia tidak mendapat pembekalan vaksin dengan lebih cepat. Proses perolehan vaksin bertambah proaktif dengan penubuhan JKJAV pada bulan Oktober 2020;

- (iv) Penghantaran vaksin oleh syarikat pengeluar vaksin yang tidak menepati jadual juga telah menyumbang kepada ketidaktentuan dan kelewatan janji temu pemvaksinan;
- (v) Tatacara khusus perolehan Kerajaan berkaitan Covid-19 oleh MOF kepada KKM dan MOSTI termasuk penurunan kuasa kepada Lembaga Perolehan Kementerian untuk memuktamadkan perolehan telah membantu dalam mengurangkan birokrasi dan mempertingkatkan kecekapan pelaksanaan peranan Kementerian;
- (vi) Penggunaan dana KWAN bagi tujuan perolehan vaksin adalah selaras dengan objektif penubuhan KWAN tertakluk kepada perbelanjaan yang berhemah. Walaubagaimanapun, PAC mendapati jumlah peruntukan RM3 bilion untuk Kumpulan Wang Covid-19 (KWC) yang diumumkan oleh MOF semasa pembentangan Belanjawan 2021 tidak diambil kira dalam keseluruhan anggaran perbelanjaan berjumlah RM322.5 bilion dalam Belanjawan 2021;
- (vii) Harga penjualan Vaksin Sinovac dalam *Private Vaccine Market* adalah tinggi;
- (viii) Mengambil maklum jawapan Perdana Menteri dalam Parlimen bahawa Kerajaan akan mula membuat bayaran untuk penggunaan aplikasi MySejahtera mulai April 2021, walaupun pada asalnya aplikasi MySejahtera adalah dibangunkan secara *Corporate Social Responsibility* (CSR). PAC berpandangan konsep CSR telah digunakan sebagai suatu mekanisma untuk mendapatkan projek Kerajaan tanpa melalui prosedur perolehan yang sepatutnya.

7. Sehubungan itu, PAC mengesyorkan tujuh (7) syor kepada Kerajaan iaitu:

- (i) Kerajaan perlu memastikan setiap kementerian yang bertanggungjawab dalam memerangi pandemik COVID-19 menggunakan peruntukan RM5.8 bilion dengan mematuhi segala tatacara kewangan semasa yang berkuatkuasa demi memastikan keutamaan kepada kepentingan dan kesejahteraan rakyat;
- (ii) Kerajaan perlu mengambil tindakan proaktif dalam memuktamadkan pembelian vaksin Covid-19 untuk kanak-kanak (5-11 tahun) termasuk meletakkan wang tempahan (*strategic bet*) sekiranya perlu, untuk menjamin penghantaran vaksin Covid-19 untuk kanak-kanak tidak akan terlewat;
- (iii) Kerajaan perlu memastikan kelestarian dana KWAN demi menjamin kesejahteraan generasi akan datang. MOF perlu memastikan segala perbelanjaan Kerajaan diambil kira dalam anggaran belanjawan negara dengan jelas setiap tahun;
- (iv) Kerajaan perlu menetapkan harga siling Sinovac yang dijual dalam *Private Vaccine Market* dengan segera dan memastikan harga siling tersebut tidak memberikan keuntungan melampau kepada pembekal; dan
- (v) Kerajaan tidak harus membuat bayaran untuk penggunaan aplikasi MySejahtera kerana pembangunannya adalah bersifat CSR. Kerajaan hendaklah mengambil alih pengoperasian aplikasi MySejahtera tanpa melibatkan apa-apa kos tambahan memandangkan ia telah menjadi sebahagian daripada sistem kesihatan negara.

8. Orang ramai yang berminat untuk membaca dan meneliti Laporan PAC Parlimen berhubung Perolehan Vaksin Covid-19 Dan Penggunaannya Terhadap Rakyat Malaysia boleh memuat turun (*download*) laporan berkenaan di laman web PAC di alamat *www.parlimen.gov.my/pac*

Sekian, terima kasih.

Yang Berhormat Wong Kah Woh